

DINO ALTESE

nato a Trapani il 21.08.1938

residente a Erice (TP) – via San Cusumano, 51

tel. 0923 – 563487

CU' VIVI VINU 'UN MORI CHIÙ

Tribbianu, 'nzolia, griddu o maraschinu,
pistatu cu li peri ntô parmentu,
rivugghi nta la utti e fa lu vinu.
Pi mia la utti è comu un monumentu,
lu ciascu comu un càlici divinu
e lu biccheri ottavu sacramentu.
Jò vivu vinu e doppu mi ni vantù
e cu lu ciascu 'n-manu vivu e cantu:

Lu vinu è zuccaru,
lu vinu à balsamu,
lu vinu è ciauru,
lu vinu è cuscusu,
lu vinu è zagara.
Lu dissi Baccu, puru Gesù:
sí vivu vinu 'un mori chiù!

Jò sugnu 'mbriacu, 'mbriacu di stu vinu
chi metti nta lu cori l'alligrìa;
sentu li noti di lu viulinu,
tu si surgenti di la fantasìa.
Ti si la varca di lu me destinu,
nmenzu lu mari di la firnicìa.
E quannu sugnu sulu e provu scantu,
vivu lu vinu e doppu scialu e cantu:

Lu vinu è zuccaru, ecc.

A postu di la cola vivi vinu
chi fa bon sangu, dici lu dutturi,
lu binirici puru lu parrinu,
lu vivi lu 'gnuranti e 'u prufissuri,
lu vivi l'omu riccu e lu mischinu,
picchi' lu vinu nasci cu suduri.
E a lu viddanu, chi si fa lu vantu,
jò dicu: "Grazi!" e ci lu dicu 'n cantu:

Lu vinu è zuccaru, ecc.

GIUSEPPE CORACI

nato a Alcamo (TP) il 27.09.1936

ivi residente – via Calatafimi, 12

tel. 0924 – 506881

A LU VINU

Vinu d'antichità fusti chiamatu
e pi li to virtù si canusciutu;
lu munnu 'nteru vivi e t'avantatu
e caru nta li festi si tinutu.
Adorni ogni tavulu cunzatu
e dunnì c'è alligria si vulutu,
però cu' la to forza nun capisci
si mbriaca e ccu li mossi si tradisci!

L'omu c'abbusa, tu, lu rimbambisci,
lu ciriveddu tuttu ci lu sfasci;
puru ch'è senza sonnu l'addurmisci
e pari un picciriddu nta li fasci.
Cchiù la vera raggiuni nun capisci
e curri 'n puppa cu li peri vasci.
Si beddu, si divinu, si eccellenti
ma tanti voti acitu addiventi!



SALVATORE CRAPANZANO

nato a Trapani il 06.08.1939

residente a Erice C.S. (TP)

via Sardegna, 2

tel. 0923 - 562369

‘A RACINA D’A MARCHISA

‘A Marchisa, ‘na matina,
‘nta lu locu si presenta
pi manciari la racina
chì la gola assai la tenta.

‘Nfila ‘a testa dintra ‘a tina
scuppunannu la puntina.
A la vista l’occhi azzanna
‘u camperi: chissa è manna!

‘A Marchisa spudurata
cu la testa è chiù ‘nchinata,
scuppunannu la mutanna
d’u camperi l’occhi appanna.

Bedda matri, sta matina
chi succeri 'nta cantina?
'A Marchisa voli mortu
'stu camperi curtu e tortu?

S" a Marchisa avi a manciari
'a racina di lu locu
c'è bisognu di sbambari
nta stu corpu lu gran focu?

'A Marchisa mi pirduna
si ci parlu a cori apertu,
l'emozioni chi mi duna
jò la viu com' un dispettu.

'A puntina mmirlittata
è 'na vera scupittata.
Si poi viu puru 'a mutanna
a ddu munnu (lei) mi manna.



ALBERTO CRISCENTI

nato a Buseto Palizzolo il 01.04.1953
ivi residente – via Roma, 248
tel. 0923-852614 / cell. 335-6868814

VINNIGNA

Avi quattordici jorna chi vinnignu,
sugnu tanticchia stancu, mi n'addugnu!
Li ammi mi li sentu ormai di lignu,
nta lu filàru lentu mi ci 'ncugnu!
Cu cucciu la cartedda cchiù nun dignu,
cchiù la talù – matruzza! – cchiù mi scugnu:
un tipu ci vulissi cchiù firrignu
strachinu di saluti finu all'ugnu!

QUANT'E' BEDDU 'U VINNIGNARI!

Quant' è beddu 'u vinnignari!
sutta 'u sulì o l'acquazzina
tutti 'n mezzu a li filari
pronti a cògghiri 'a racina!

Cu li forfici e 'i cuteddi
rappa a rappa la cugghiemu
finu a quannu li carteddi
di ssu beni poi ringhiemu!

Ntô rimorchiu d"u tratturi
la cartedda sdivacamu
e cu rinnuvatu arduri
ntô filaru arrè 'ncugnamu!

Ogni tantu pizzuliamu
quarchi cocciu di racina
e d"u zuccu si jisamu
pi sgranchiri la carina!

Mentri un cantu duci è finu
'n ogni cori si "rimina",
lu tratturi, doppu chinu,
prestu parti p" a cantina!

Cala 'u sulì nta la vigna!
quannu semu a la scurata
damu focu a un mazzu 'i ligna
e facemu 'na vampata!



ANTONINO FONTANA

nato a C/mare del Golfo (TP) il 01.05.1928
ivi residente- via Agordatt, 14
tel. 0924-32409

LA VINNIGNA DI 'NA VOTA

Nta settèmmaru, doppu la Bammina,
ognunu cuminciava a vinnignari
facennu matinati e siritina:
vecchi e picciotti si sintìa cantari!
Tagghiannu nta lu zuccu la racina
cu bona vuluntà di travagghiari,
quannu chi la cartedda era già china
nta li tineddi la jianu a sbarrari.

Mentri lu tinidderi jia e vinìa
purtannu la racina a lu parmentu,
lu pistaturi 'na corda tinìa
pistannu la racina nta un mumentu.
Lu sirratizzu di mustu s'inchìa,
li vitalora nun avianu abbentu;
cu' di vinazzu li coffi inchìa
pi dàrici la stritta a passu lentu.

Poi quannu chi scurava la iurnata
cu amuri, fratillanza e cu rispettu
c'era cu' si facià 'na ballata
sunannu tammureddu e friscalettu.
Cu' è chi vulìa satari la vampata
currennu si partìa comu 'n giannettu
e quannu chi finìa la sirinata
si n'gianu a ripusari nta lu lettu.

Lu carritteri si susìa matinu
pi ghìrisi lu pani a guadagnari,
'mpaiava lu cavaddu a lu trainu
pi ghìrisi lu mustu a caricari.
Dunni li sirratizzu era chinu
la "regia guardia" si sintìa cuntari
pi quattru sarmi ogni vutti di vinu
ni misurava trentadui quartari.

Soccu era la vinnigna di 'na vota
putemu chiddi vecchi raccontari
a cu' è chi va currennu a brigghia sciota
circannu di divèrtisi e scialari.
Di la saggizza chi aviamu pi dota
la pèrsimu e cummeni 'un ni parrari.
A occhìu nuru la cosa si nota:
dicu la virità, m'ata a scusari!

FRANCESCO LEONE

nato a C.mare del Golfo (TP) il 12.01.1928

ivi residente – viale L. Da Vinci, 150

tel. 0924-31929

AMURI A LA VINNIGNA

I

All'arba sunnu 'n menzu a li filara.
Lesti di manu, li vinnignatura
ncucùccianu carteddi cu primura.
Li picciriddi inchinu panara.

Senza lintari, li sturnelli canta
Turiddu chi cu Rosa fa l'amuri.
Idda rispunni, china di russuri,
cu 'na vucidda d'ancilu chi ncanta.

Turiddu “Ciuri di canna,
lu cori meu, ciatuzzu, pi tia spinna,
pi ssi labbruzza toi di meli e manna.
Ciuri di canna.”

Rosa “Ciuri di sudda,
si mpiccicusu, tu, comu la codda;
mi pari chi tu sì senza mirudda...
Ciuri di sudda.”

II

Turi ci fa l'amuri, idda lu sdegnu;
però lu cori so si fa ribbeddu.
Ci dici l'ariu e voli diri beddu,
chì lu vulissi re di lu so regnu.

Iddu nta un lampu inchi la cartedda,
poi sveltu sveltu aiuta puru ad idda.
Di sgarru ci accarizza la mascidda,
ci dici: "Amuri meu, quantu si bedda!"

Turiddu "Ciuri di ciuri,
pi tia, amuri, soffru li martiri,
comu la coffa sutta 'u strincituri.
Ciuri di ciuri."

Rosa "Ciuri d'amenta,
arràssati di mia, omu birbanti!
Di lu suffriri to sugnu cuntenta...
Ciuri d'amenta."

III

Dici di no, ma ci chianci lu cori,
chì lu vulissi strinciri e vasari,
tuttu l'amuri ci vulissi dari,
milli carizzi cu duci palori.

Sunnu vagghiardi li vinnignatura:
portanu la racina a lu parmentu,
lu pistaturi chi nun àvi abbentu
abballa e satarìa di gran primura.

Turiddu “Ciuri di spina,
te cca lu sangu meu, donna baggiana:
tu s'è lu pistaturi, eu la racina.
Ciuri di spina.”

Rosa “Ciuri di serra,
lu cori to, di nnamuratu parra:
cu ssi palori vincisti la guerra.
Ciuri di serra.”

Turi-Rosa “Zagara ‘n ciuri,
vincemu tutti dui, nun c'è chi diri,
ora chi tra di nui sbucciau l'amuri”.



VITO LUMIA

nato a Mazara del Vallo (TP)

il 14.02.1940

residente a Trapani – via Fedra, 10

tel. 0923 - 539410

PI LA FESTA DI LA RACINA E DI LU VINU

Vinu?... Vinnigna?... No, nun è pi mia!
Cu' mi ci porta ddocu? Chi ci trasu?
Cu sta 'gnuranza ca mi patrunìa
zoccu ci cuntù? No, nun è lu casu!...

Comu li ncugghiu du' virsuzzi duci,
penzu e ripenzu cu lu cori 'n-manu,
pritennu di cantari senza vuci?
Stu fattu, amici, nun vi pari stranu?...

Canusciu lu misteru di li venti:
Libìci cu Sciroccu e Tramuntana,
di mari, di timpesti e bastimenti
iu ni parrassi na simana sana!

E megghiu ancora putissi parrari
(sennu marinaru) di trimulina,
di l'unna chi s'annàca mari mari
e doppu sbatti contru la banchina...

Ma vi cunfessu ca nun sacciu nenti
di vinu, di racina e di vinnigna,
lu dicu chiaru e tunnu a cu' mi senti...
Aiu cosi di rascarimi la tigna!

Perciò, si m'accittati a stu fistinu,
nun v'offiniti si scarrozzu un pocu,
nun sacciu comu 'u mustu si fa vinu,
nuddu mi lu 'nzignau a tempu e locu.

Però nun sugnu propiu analfabeta,
sacciu ca lu vinuzzu a tutti piaci,
lu vivi lu piscaturi e lu pueta
e puru lu parrinu a taci-maci.

Ssu nètteri chi preju metti 'n-testa:
chi gioia, chi dilizia, chi alligria;
senza tanfu di vinu nun c'è festa,
è lu nimicu di la malincunia!

Diventa, appena trasi nta la panza,
la megghiu miricina di la vita,
astuta l'odiu, adduma la spiranza,
di bottu cura e sana ogni firita!

Lu vinu? chi buffuni!... 'Un si ci criri
chi beni e chi miraculi sa' fari,
po dari, a cu' l'ha persa, nova firi,
li corna a li curnuti fa scurdari!...

E metti paci unni ca c'è liti,
abbampa lu cori a li nnamurati
e metti l'ali ô tempu di li ziti:
'n-tempu ri nenti accurza li jurnati...

Turnannu a ddu scarrozzu penzu e dicu
ca 'u vinu è lu sangu di lu viddanu
chi campa sempì poviru e minnicu
e nun c'è nuddu ca ci proj na manu...

E zappa e suda sempì di cuntinu,
jornu pi jornu nun ni trova abbentu,
supporta cu curaggiu ssu distinu,
di la so vucca mai nèsci un lamentu!

Veni lassatu sempì sularinu
e troppu spissu nun cogghi li spisi,
si cari lu governu, ssu mischinu,
paga pi primu 'u prezzu di la crisi!...

Scusati si mi 'ntricu, ma ssu vinu
pircui stasira è 'n-festa stu paisi,
appena ca finisci stu fistinu
chi lu mannati 'n-Francia a li francisi?

Vi vogghiu diri na gran fissaria,
curriggitimi siddu dicu mali,
si cala lu prezzu, ascutati a mia,
vinnitivillu p'acqua minirali!

VIVA LU VINU!

Vinu ni vivu picca a pranzu e cena
e fora tavula nun ni vivu mai,
ma si stu cori soffri amara pena,
siddu m'attrovu nta 'n-mari di guai
tannu, corpu di sangu chi mi pigghia,
affunciu e mi ni sculu na buttighia!

Lu vivu quannu la malincunìa
mi struri cu ddu chiantu ca 'un si senti,
quannu aiu bisognu e nuddu mi talìa
lu vivu a la facciazza di ssi genti,
gintazza tinta, propiu senz'amuri,
ca si ni futti di lu me duluri!

Lu vivu quannu moru nguttumatu,
quannu mi sentu contru lu distinu,
l'agghiuttu pi livarimi di statu
quannu mi sentu fraccu e sularinu.
Quanu mi sentu aceddu senza l'ali,
quannu simìnu beni e cogghiu mali!

Lu vivu pirchè 'u vinu duna vuci,
a l'occasioni nun c'è megghiu nguentu
m'alliggrisci 'i spaddi di sta cruci
puru si l'aiu 'n-coddu nun la sentu!...
Pi chissu mi ni fazzu 'n-bicchirinu
cantannu la canzuna di lu vinu!

Lu vinu fa ciuriri li pinzeri
e grapi l'ali di la fantasia,
sulleva duci duci li me peri
nta lu cori fa sbucciari puisia,
abbunna nta la vucca lu surrisu,
mi porta allegramenti 'n-paradisu!

O vinu, vinu! st'arma mia s'alleta
appena agghiuttu lu primu vuccuni
e cantu cu stu cori di pueta
allegramenti li megghiu canzuni...
E siddu mi mbriacu, 'n-funnu 'n-funnu,
mi sentu lu patruni di lu munnu!

Lu vinu sapi sturdire la menti:
debiti, malatii, pesti e feli
e cu' ci penza chiù? 'N-tempu ri nenti
comu 'n-aceddu volu celi celi!...
E si fussi dutturi ogni matina
lu dassi a tutti comu miricina!

Amici, si capistivu 'u baccagghiu
nun stati ancora ddocu mbarsamati,
livati ô carratuni lu stuppagghiu,
prujiti ssu vinuzzu strati strati...
Pi dari onuri e gloria a stu fistinu
cantati 'nzemi a mia: viva lu vinu!



GIOVANNI MANNINO
nato a Carini (PA) il 20.11.1937
residente a Bagheria (PA)
via M. D'Azeglio, 53
cell. 368-7852205

QUANNU ME' NANNU

Quannu mè nannu mi dissi
ca lu vinu si pò fari puru cu la racina
mi vinni 'na granni smania
di cultivari la vigna.

Quantu travagghiu
prima di la vinnigna
putari, zappari, 'mpupari
e fortunamenti
'un la pigghiò la farinedda.

Granni festa cci fu pi la vinnigna
canti curali e sbriu 'n famigghia
manciannu sardi salati
e murtadella.

Poi pi scafazzari la racina
ballamu ‘nta la tina
purtannu lu mustu
a la cantina.

Nuddu ti vattiò sucu di racina
e tastannu tastannu
lu liveddu scinnia
futtennuminni siddu la utti
‘un era cchiù china.

Mentri allitratu traballavu
facennu un passu avanti e dui nnarreri
mi vinni ‘n menti un dettu paisanu...
e allungannu lu vrazzu cu la chiavi ‘n manu
‘ntra mia e mia dissi:
“Siddu è veru ca lu munnu gira
la mè casa havi a passari di cca.”